

Jeremy Miles AS, y Cwnsler Cyffredinol a'r Gweinidog

Pontio Ewropeaidd

Rebecca Evans AS, y Gweinidog Cyllid a'r Trefnydd

24 Medi 2020

Annwyl gyfeillion

### **Torri'r rheol 21 diwrnod, a materion eraill yn ymwneud â deddfwriaeth cysylltiedig â Covid**

Yn ein cyfarfodydd ar 14 a 21 Medi 2020 gwnaethom ystyried **Rheoliadau Diogelu Iechyd (Coronafeirws, Teithio Rhyngwladol) (Cymru) (Diwygio) (Rhif 6) 2020**, **Rheoliadau Diogelu Iechyd (Coronafeirws, Teithio Rhyngwladol) (Cymru) (Diwygio) (Rhif 7) 2020**, **Rheoliadau Diogelu Iechyd (Coronafeirws, Teithio Rhyngwladol) (Cymru) (Diwygio) (Rhif 8) 2020**, a **Rheoliadau Addysg (Cymorth i Fyfyrwyr) (Graddau Meistr Ôl-raddedig) (Cymru) (Diwygio) (Coronafeirws) 2020**.

Roedd ein hadroddiadau dilynol yn nodi bod yr offerynnau wedi'u gosod **gan dorri'r rheol 21 diwrnod**, a bod y rhesymau dros wneud hynny fel y'u nodwyd yn llythyrau'r Gweinidog Cyllid a'r Trefnydd at y Llywydd, yn ôl eu trefn.

Ysgrifennais atoch nifer o weithiau yn ystod y tymor blaenorol yn dweud ei bod yn ymddangos bod achosion o Lywodraeth Cymru yn torri'r rheol 21 diwrnod yn digwydd yn fwyfwy rheolaidd. Er ein bod yn cydnabod ac yn derbyn y gall fod rhesymau dilys dros dorri rheolau o'r fath, yn enwedig o ganlyniad i bandemig y Covid-19, hoffwn ailadrodd y pwynt na ddylid normaleiddio'r arfer o dori'r rheol 21 diwrnod mewn unrhyw fodd.

Hoffwn hefyd gyfleu ein pryderon am eglurder a hygyrchedd y gyfraith o ran y rheoliadau niferus sy'n cael eu gwneud. Er ein bod yn croesawu'r ffaith bod Llywodraeth Cymru wedi datblygu ei **thudalen we Coronafeirws a'r gyfraith** ei hun, nododd ein gwaith craffu ar y Rheoliadau Diogelu Iechyd (Coronafeirws, Teithio Rhyngwladol) (Cymru) (Diwygio) (Rhif 6) 2020 gyfyngiadau'r wybodaeth a ddarperir ar y dudalen we hon, yn enwedig o ran argaeledd rheoliadau diweddar yn Gymraeg. Nodwyd hefyd mai dim ond yn Saesneg y mae fersiwn gyfunol ddiweddar o'r rheoliadau hyn ar gael yn [legislation.gov.uk](http://legislation.gov.uk). Ar adeg pan mae gwelliannau'n cael eu gwneud i reoliadau mor aml, rydym yn ei hystyried yn hanfodol bod gwybodaeth glir ar gael er mwyn i'r cyhoedd ddeall yn llawn y newidiadau sy'n digwydd.



**Senedd Cymru**

Bae Caerdydd, Caerdydd, CF99 1SN

 [SeneddDCC@senedd.cymru](mailto:SeneddDCC@senedd.cymru)

 0300 200 6565

**Welsh Parliament**

Cardiff Bay, Cardiff, CF99 1SN

 [SeneddLJC@senedd.wales](mailto:SeneddLJC@senedd.wales)

 0300 200 6565

Byddwn yn parhau i fonitro amlder ac amgylchiadau achosion o dorri'r rheol 21 diwrnod yn y dyfodol, a pharhau i fonitro hygyrchedd is-ddeddfwriaeth yn ymwneud â Covid ar yr un pryd.

Yn gywir



**Mick Antoniw AS**  
**Cadeirydd**

Croesewir gohebiaeth yn Gymraeg neu Saesneg  
We welcome correspondence in Welsh or English

